

DURANGO. Datorren abendurako edegi gura dabe Kafe Antzokia



JON HERNÁEZ / ARGAZKI PRESS

Kafe Antzokia hainbat kultur eragilek babestu dabe

Euskal Herriko hainbat kultur eragilek emon deusie babesa Durangoko Kafe Antzokiaren egitasmoari. Berbaro euskara alkarteak bultzatutako proiektua aurkezteko ekitaldian horreetariko asko batu dira Durangon: Andoni Egaña, Xabier Amuriza, Unai Iturriaga eta Igor Elortza bertsolari eta idazleak; Joseba Tapia, Petti, Mikel Urdangarin, Igor Arzuaga eta Josu Zabala musikariak; Asier Serrano idazlea eta musikaria; Rafa Rueda PILT taldeko kidea eta Jon Ander Ubeda Bide Hertzian taldeko kidea. Halandabe, ekitaldian parte hartzerik izan ez daben arren beste hainbat kultur eragi-

leren babesa be jaso dau Durangoko Kafe Antzokiaren egitasmoak: Anje Duhalde, Sorkun, Anari, Andoni Tolosa *Morau* musikariena; Bide Hertzian musika taldeko kide Imanol Ubedarena, Maialen Lujanbio bertsolariarena eta Kirmen Uribe idazlearena, besteren artean. Kafe Antzokiko arduradun Beñat Gaztelurrutiak gogoratu dauen lez datorren abenduan itxaroten dabe edegitea. Landakosoloan izango dau lekua: 1884an eregitako antxinako hiltegia. Milioi bat euro inbertiduko dabez eta horrei aurre egiteko 500 euroko 2.000 partizipazio ipini dabe herritarren eskura.

Kriskitin eta Begoña Urresti saritu dauz +Dendak taldeak

Komertzioaren V. Galea egin dabe San Agustin kulturgunean

Aitziber Basauri |

Durangoko Kriskitin dantza taldea eta Begoña Urresti iurretarra omendu dauz, aurtongoan, +Dendak Durango eta Iurretako merkatarien alkarteak. Omenduek, arenegun, San Agustin kulturgunean egindako Komertzioaren V. Galearen barruan jaso ebezan +Dendak Durango eta +Dendak Iurretara sariak. Horrezaz ganera, merkataritzeari laguntza tekniko emoteko gabinetean beharrean jardun daben Estibalitz Etxebarria eta Ainare Barrena be igon eben taula ganera. Biek be oroigarria jaso eben, Duragaldeko komertzio txikiari laguntzen egindako beharragaitik.

Merkatariek Kriskitin dantza taldeak euskal kulturea bultzatzeko egindako beharra omen du gura izan dabe +Dendak Durango saria emoterakoan; era berean, Begoña Urrestik ikastetxeetan irakasten egindako bidea nabarmendu dabe +Dendak Iurretara saria emoterakoan.

Iurretako Nagusien Egoitzako lehendakari be izan da bera azken hiru urtean.

Giro politan egin eben galea. Kriskitin dantza taldeak be eskaini eban ikuskizuna, eta saloi dantzak ikusteko aukerea be izan eben San Agustin kulturgunean batutakoek. Vanessa Goikoetxea abeslariak be eskaini eban emonaldia eta Fernando

Ekitaldiak

Kriskitinek, Vanessa Goikoetxea abeslariak eta Fernando Cuesta magoak girotu eben galea, besteak beste

Cuesta magoak agurtu eban galea. Gero, luntxa izan eben.

Iñigo Sarasketa +Dendak alkartearen lehendakariak, urteko balantzea be egin eban. «Hamaika atxaki jarri leitekez. Munduko krisia, moneta aldatu

dala, egoera politiko ezerosoa, eskualdean azalera handiko gero eta merkataritza gune gehiago dagozala..., baina, kontua da salmetak behera egin dabela».

«Kalidadezko» merkataritza lortzeko pauso barriak

Saraskateak nabarmendu eban, +Dendak alkarteak Durango eta Iurretako merkataritza «kalidadezkoa» izan daiten «pauso gehiago» emoteko asmoa daukala. «Prestakuntzeari ekin eta eutsiko deusagu, gure komertzioak hobetzeko eta erabartzeko. Holan gure gizartearen be eragiteko». Merkatarien alkarteak barriak sortzeko ahaleginduko dirala be esan eban.

Sarasketaren berbetan, «erakundearen laguntza barik merkataritza txikiak ez daukie etorkizunik. Durangaldea inoiz baino gehiago behar dauz laguntzak; izan be, 1.000 familiatik gora bizi da merkataritza txikitik eta, profesional autonomoak diran neurrian, besterik ez daukie, bere negozioa ez bada.

ARRATIA. Bihar hasiko dabe kultur egitaraua

Antzerkia, olgetalekua, kontzertuak eta dantzak eratu dabez Gabonetarako

A.B. |

Igorre eta Arantzazuko udalek alkarlanean hainbat ekitaldi gertatu dabez Gabon saioari begira. Barikuan ipiniko dabe martxan eratutako kultur egitaraua. Oihulari Klown taldeak antzezlan eskainiko dau, bihar, Igorreko kiroldegian 11:00etan. Horrezaz ganera, arrastian, Arratia musika eskoleak gabon kontzertua eskainiko dau Andra Mari elizan. Ekitaldia 19:30ean hasiko da.

Urteroko orduari huts egin barik, hilearen 24an, Olenzerok urtengo dau Igorreko udaletxeako plazatik, 16:30ean; eta abenduaren 27an, umeendako olgetalekuak edegiko dauz ateak. Puzgarriak, jolasak, tailerrak, antzerkia, txokolatadea... hartuko dauz kiroldegia. Goizean eta arrastian izango dabe zabalik olgetalekua:

11:00etatik 13:00era eta 16:00etatik 20:00etara.

Oskorrik eskainiko dau kontzertua kiroldegian

Arantzarte dantza taldeak eta Luis Iruarizaga abesbatzeak eskainiko dabe saioa hilearen 28an. Kiroldegian izango da 18:00etan; eta hilearen 29an, barriz, Oskorri taldeak emongo dau kontzertua kiroldegian be bai, 19:00etan. Beste alde batek, Gabon Zahar egunean eskupelota partiduak ikusteko aukerea izango da.

Urtarrilerako be gertatu dabez ekitaldiak. Bilboko Gabonetako olgetalekura urteare eratu dabe urtarrilaren 2rako; eta, urtarrilaren 3rako, Euskalduna jauregira. Errege bezperan desfileak urtengo dau; eta hilearen 6an, Saskibaloiko XVI. Errege Txapelketea jokatu dabe kiroldegian, 17:00etan.

LABURAREN

OTXANDIO

Pasealeku jubilauren alkarteak jaia eratu dau gaurko

Otxandioko Pasealeku jubilauren alkarteak jaialdia eratu dau, gaurko, nagusien egoitzan bertan. Jaialdia 16:30ean hasiko dabe, eta egoitzako nagusiei eskainitako jaia mezeagaz hasiko dabe. Ostein, luntxa be eukiko dabe, eta trikitilariak dantzaren egiteko aukerea be. Egoitzan dagozanen artean erregaluk be bananduko dabez.

DURANGO

Pertsonen izen historikoak idazteko arazoaren ganean berba egingo dabe Arte eta Historia Museoa, gaur

Durangoko Arte eta Historia Museoa, pertsonen izen historikoak euskeraz idazteko dagozan arazoak izango dabez, gaur, berba. Jaione Agirre eta Irati Izarrek *Juan de Zumarraga* vs. *Joan Zumarragako*: pertsona izen historikoak Durangaldean berbalda eskainiko dabe eta; horretarako Durangoko dokumentazio historikoa aztertuko dabe. Ekitaldia 20:00etan hasiko da eta Erdi Aroko sistema patronimikotik oraingo familia abizenetara izandako bilakaerea erakutsiko dabe. Euskal abizenak zelatan diran ulertzeko aukerea izango da, eta, izen historikoak euskeraz emateko proposamena emongo dabe.

AGENDA

ERMUA

Berbaldia: Ermuko XI. Jardunaldi Antimilitaristen barruan berbalda emongo dau, gaur, Alberto Arabak, nazioarteko politikan adituak. *De Afganistan a Irak, un año de militarización mundial bajo la excusa del 11-S* izango dau berba. Probalekua kaleko 4bis beheko lokalean 19:45ean.

ARTEA

Erakusketea: Ana Frank, gaurko

historia bat erakusketea ikusi leiteke, Euskal Abertzaletasunaren Museoa, Manu Egileor aretoa. Bilboko Euskal Museoagaz aurkeztutako nazioarteko erakusketea, Ana Franken Etxeak (Herbehereak) sortu eta diseinatu da, eta 30etik gora herrialdetan ikusi dabe.

ZORNOTZA

Erakusketea: Bosteko 2002 ikusi leiteke Zornotza aretoa. Rafael Ruiz, Carmelo Ortiz de Elgea, Ramon Zurriarrain, Jose Ramon Anda eta Andres Nagelen obrak ikusi leitekez.